

# Lèsnan di Luis

Chito a kumpra un buriku serka Benito. Apesar ku Benito a sigur'é ku e buriku lo hasi tur loke e ta bis'é, tòg e buriku no kier a tende, maske kuantu Chito a papia ku n'e òf grit'é. Fadá Chito a hiba e buriku bèk serka Benito. "E buriku no ke tende pa nada. Na'mi mi sèn," Chito a demandá. "Trankilisábo, Chito. E buriku ta tende," Benito a insistí. "Mi a lubidá di bisábo un kos." Benito a kohe un balki, his'é na laira, dal e buriku duru riba su kabes. "Bo tin ku kapta su atenshon promé!" I dicho echu, e buriku a obedesé.

Hopi bes nos ta tende Dios Su instrukshon. Ma méskos ku e buriku, nos tin orea duru. Nos no ke obedesé. P'esei Dios por usa un òf otro manera pa kapta nos atenshon: un sla, enfermedat, aksidente...orkan.

Siman pasá, nos tur a keda ku nos orea di plak na radio i wowo fihó riba televishon, hambrá pa informashon. Nos a ansha huntu ku nos hermana islanan, St. Maarten, St. Eustatius, i Saba ora orkan Luis tabata na kaminda. Miéntras e bientunan sumamente feros, olanan gigantesko, i yobida torensial di Luis a asotá e islanan aki, na nos islanan e silencio okashoná pa e falta di komunikashon tabata sofokante.

Sin duda Dios a kapta nos atenshon! Mandatarionan i otro lídernan den nos komunidad a pidi pa puebel hasi orashon, rogando Dios altísimo pa spar e islanan. Tabatin sirbishinan dediká pa e proposito aki. Nos a sinti asina impotente kontra bientu ku velosidat devastadó di 224 kilometer i olanan brabu ku ta subi tera. Despues ku Luis a somentá i nos a kuminsá komprendé e magnitud di e katástrofe, atrobe tabatin apelashon pa orashon pa forsa pa e tantísimo damnifikadonan, esnan heridá, i otronan ku ta sufriendo pa kousa di e orkan.

Si, Dios a kapta nos atenshon! Ma pa kuantu tempu? Nos ta lubidá Dios asina lihé. Nos tin e impreshon ku nos tin mester di Dios SOLAMENTE pa kosnan fuera di nos kontrol i alkanse. Nos ta kla pa sklama pa Dios Su yudansa na momentu di aksidente, enfermedat inkurabel, orkan, èts. Ma una bes ku e situashon ta normalisá, nos ta lubidá tur orashon, ta warda Beibel masha leu, i ta evitá di buska kamina di Dios. Nos ta méskos ku e buriku ku orea duru.

Dios no t'ei solamente pa e eventonan grandi, spantoso, i desastroso den bida. E ta sumamente interesá den kada detaye di bo bida. E ke tin un relashon personal ku bo pa medio di Hesu-Kristu, i ke mantené kontakto ku bo DIARIAMENTE

Un otro lès ku nos por siña di Luis, ta ku hopi di nos prioridatnan ta dilanti patras. Hopi hende ta biba pa haña mas sèn, akumulá mas kos material, traha kas mas grandi, yena kas ku tantísimo fasilidat elektriiko, moderno, luhoso, plasentero, komfortabel. Beibel ta yama rikesa algu "ku no ta sigur" (1 Timoteo 6:17). Luis a demonstrá ku elokuensia ku Skritura tin rason; ku kosnan material ku tin tantu balor pa nos, ku nos ta dediká tantu esfuerso pa akumulá, por desaparese den un será di wowo.

Ademas, na momentu di orkan, tur e kosnan tan deseá ta pèrde balor. Durante e tempestat bo ta ripará kiko di bèrdat tin prioridat. Na e momentu ei, loke ta importante ta bida humano i bo famia. Kos material por bula bai. Nan por ser remplasá. Ma NO POR REMPLASA bida humano i bo famia. Na un momentu asina, ni un regalo di shen mion florin ta atraktivo.

I un otro prioridat ku hopi hende ta kòrda ora nan bida ta na peliger, ta nan relashon ku Dios. Nan ta kòrda Dios ora awaseru ta inundá nan kas, ora bientu ta ranka dak kita, ora bos ta zona i welek ta kòrta, ora palu ta kai riba kas. Ma despues di e tempestat, ora e peliger a pasa, nan ta lubidá Dios. Atrobe nan prioridatnan ta birá kabes abou.

Palabra di Dios ta bisa, "Kiko ta yuda si un hende gana henter mundu i sufri pèrdida na su alma?" (Marko 8:36). Hopi hende ta biba pa "gana henter mundu." Ma ora morto ta bati na porta, rikesa, puesto, fama tin ningun klase di balor. Ningun hende ta haña entrada serka Dios na shelu sin aseptá Kristu sinseramente komo Salvador personal i a biba manera E ta deseá.

No laga nos ta manera e buriku ku orea duru. Dios a hala nos atenshon ku orkan. Laga nos siña e lèsnan di Luis.